

施愚山全集

第一函
五十五册

施愚山先生學餘詩集卷之六

一言古

書感

士哲能不憂中人尚知足偃鼠飲長河快意在滿腹神龍失所依進退成抵觸天道亦何常平地多翻覆積毀詎有階守正豈蒙福吉凶吾曷從握粟未敢卜

清源行

視學秩滿將歸道經臨清諸生携具相餉却再四不可嗟乎施子服官不得盡其道循職而已諸生復何德予哉作清源行

駕言及星爛輟軌已夕陽逝將返初服戒僕裹餼糧濟濟二三子依依登我堂長跪出篇什携贈兼酒漿苦辭不忍去佇立久徬徨改顏為斟酌僕馬各充腸平生薄口腹此意獨難忘春風拂前浦芳草生清光含情無可極遺響託滄浪

北海有一士為孫子仲孺作

實侗址亭相國子

北海有一士高步覽八區簪纓推世胄章句薄腐儒嗜古賞自延探奇目無虛藩溷盡筆札坐卧皆詩書非徒富述作實耻經術疎趨庭過薊北結友連東吳平生

非任俠意氣雄千夫男兒貴不朽浮名何足圖盛年振高轡策驥騁修塗

留別徐符嶠臬使

燕臺射策時與子同陋巷晨昏屢叩門索酒竭鄰釀聯袂捷南宮時艱資倜儻王
師方入粵特簡俾司餉三年冒矢石側身飽炎瘴闢地始到官瘡痍非一狀奉使予
南征入覲子北向上下各孤舟風帆不相傍到今臬東藩把臂喜無恙同志絕然
疑感舊叙少壯法嚴多大獄誰肯問无妄寬和干國憲刻急叢物謗慘澹慎平反
讞成懷餘愴有時厭丹筆舉杯眺青嶂聞我歸故園惜別獨惆悵野性習沙鷗五
湖將浩蕩感茲意拳拳含情辭祖帳

發濟南示諸生

曰歸不暇寐中夜趣晨裝清泉帶城郭依依垂綠楊羣公列祖帳臨發難盡觴
繾綣復多士追送踰川梁下馬與之揖羅拜淚沾裳齊魯古大國東海風泱泱起衰
吾未逮知已胡不忘逝矣千里心悠悠九迴腸雖下董生帷誰升孔氏堂黽勉有
遺恨努力永相望

寧陽行

各行倦修塗流民填路隅吞聲但長跪淚下沾衣襦停車傾我篋人給慚錙銖去此未及遠接踵相號呼誰能盡沾灑緩死爭須臾去年民為魚今年麥又枯豈無觸租令不得收溝渠蕭條日將夕酸鼻空踟躕

過洪林值湯衣白邀宿

東峰餘返景疲馬嘶秋原黃花寒婉孌流水莫潺湲所親值野老邀我歸南村喬木秀墟里零露繁草根笑歌不覺遠明月方在門苦陳去年亂窮巷無雞豚園蔬雜筐果顛倒引匏尊夜深卧草閣閉戶溪聲喧白雲入檐隙浩然清心魂

秋夕邀吉水宗人偉長宛溪汎月兼送其遊潯陽

同大美阮懷耦長

輕雲歸遠岫涼月見江樹棹歌可遊娛心賞未遲暮亭亭謝公樓皎皎出城頭潛鱗聚可數微露溥芳洲水流宵不歇客子行當發盆浦潮有無廬峰興超越歸塗近鄉國羈緒悵離別言攀九疊屏儻憶雙溪月

避風入二條港

解維燕子磯白浪阻征路橫江紆桂楫曲港截瓜步一水蓼花洲夾岬垂楊樹田家開野店籬菊含秋露遠見棲霞山青青若回顧不有石尤風那盡江村趣

妙高臺夜坐懷元可

即子瞻佛印賦詩處

日落水烟起茫茫連岸白褰裳陟高臺涼月皎秋夕古人不我待露氣霑瑤席忽憶龍眠叟遠引就禪寂桂嶺舊擔簦匡廬復飛錫遊咏與之俱屢折登山屢勸我學無生危言同振溺心跡未能併出處尚狼藉解帶思同遊天末久離析人生無老少皆為天地客東望海門深南睇江雲碧巖壑留清暉皓歌傷往昔

題王阮亭漁洋山人集

有客卧招堤聞鐘百慮止時見楚江月遙從烟際起橘柚垂虛簷清先生石几手把瑤華音靜念同懷子綺麗復清泠濡翰信云美心目散山川衣裳被蘭芷羈人易感觸三歎不能已寂寞將移情茫茫聞海水

登文選樓

廣陵精忠寺後有昭明太子像

遊目憩精廬陟閣復清迥綺疏烏雀喧層軒松檜冷白雲緬逶迤隔江矚峰影哲胤薄黃屋篇章性所秉欣賞集羣彥朝譙達夕永創獲矜校讎散籍歸匠郢梁社久丘墟隋宮餘舊井廢興更代謝丹樓復華整斯人既已邈望古還引領橫流賤毫素蘭茝雜萍梗眇眇千春懷淚下如修鯁

吳母苦節詩

歛人胡氏早寡撫遺腹子延支終其身

君遺妾有身妾思君同穴夙昔嫁君衣拭淚盡成血別鵲一何早哺雛一何好萊
彩曜中庭妾身自綦縞喔喔霜雞啼札札鳴機絲機絲有斷續素心無改移

歲暮送陳伯璣之武林

先是期偕往不果

停楫待同舟送君成獨發惆悵紛難陳伫立生白髮養疴歲序殫客愁無斷絕北
風吹孤蓬安知吳與越江頭楓樹寒雙鳥啼不歇中宵吾有夢先向西冷月

平山堂

寒色靜四野平岡走孤獸振策肆重遊蕭條改結構荒榭俯宿莽頽垣繚虛囿抗
軌思昔賢遊讌賁巖岫悠悠六百年遺徽邈難邁殘荷尚餘葢丹楓錯成繡喪亂
悲山川戎馬此馳驟舉目睇京峴巖飈暗清晝懿此崖際泉清冷聊可漱

董仲舒祠

攘攘五都市南北交驅馳貴賤各有營崩迫無停時我過董子祠中心悵有違相
傳此舊宅精靈儼在茲斷碣蝕蒼蘚荒几走伊威蘋蘩誰復薦清風吹我衣漢初

尚文籍大道久迷離夫子挈墜緒卓矣王者師如何末世士罄折爭刀錐威鳳翔
九仞腐鼠安足希

曉望燕子磯

挂席沂奔流回眺滄洲靜渚烟暖未分巖雪殘逾瑩峻嶒松色寒窈窕嵐光靚延
目辨蒼茫木末露樵徑亭剝何參差丹青遞掩映不見六朝僧遠聞一聲磬

舟中望采石

孤嶼起中流巖業連江岼霜巖碧松白樓迴朱霞爛巨石陵天門崖字久漫漶咏
史想遺音然犀懷壯觀潮汐自往來人物幾凋換颶急吹豚魚天陰鳴水鸛英雄
此戰爭回首一悲嘆

早春三天洞至仙人巖

寒巖斂衆妙惠風蕩疎木洞穴無人居玲瓏闢華屋春陰香乳流谷溫瑤草綠出
戶見前峰重雲無斷續乘興復杖藜行歌散煩促古樹含丹葩餘雪長靈瀑僧扉
鑿陽崖蒼白入深竹采真客安往悵望空山曲

宛溪春水曲

夜宿水聲中朝汎山烟裏洲沉沙尾截雲疊魚鱗起春風不可贈美人望江記愁
心與白蘋搖蕩幾千里

微雨至慈靜寺

同陶夢刻

積雨知不晴薄陰亦可喜舟浮葭茨沒權撥鴛鴦起捲幔受輕風憂軀散甘醴青
峰雲霧交明滅同海市不惜濕芒鞋遠踏空濛裏南屏枕寺閣井泉湛階啟古塔
挂新蘿丹青爛成綺官冥嘯嶺猿羈懸迷山鬼回艇睇前峰惟見碧湖水

湖上荅陸麗京

翡翠集蘭茗鳳凰棲崇岡光輝各燦爛羽翼難頡頏西陵富才彥哲匠挺珪璋閥
閱豈不貴蓬室潛幽光矯志厲金石濡翰辭篇章譬彼陽春月百卉敷芬芳窮岫
逢赤松跪受不死方蘭櫂激清流為樂殊未央永言申宿好德音不可忘

贈柴虎臣

與君始投分把臂遊長安列坐盈觴酒吐論中情彈清秋朔風厲良會忘夜闌篇
翰曜連璧客子為加餐山川一離析春華成歲寒孤鶴潔羽翼斂啄良獨難竭來
卧城隅咫尺限重關浮雲隨迅飈萬里何時閒相望懷慊慊撫枕一長嘆

贈毛馳黃

所著有韻
學辨諸書

總轡息江汜采蘭臨芳洲佳人惠良訊願言同行遊矢口發丹葩德音申綢繆餘
波沿六季高唱溯商周律呂既精析風騷資討求綺麗傷人心忼慷淚雙流申椒
雜眾草道遠無蹇修不如呼所歡飲酒登高樓

留別越中諸子

時徐伯調和止祥毛大可張南士
姜桐音沈康成羅弘載相繼至

我昔遊會稽息駕瑯琊山賓從共翱翔長嘯浮雲間興文歡受簡臨水駢芳筵朱
李泛南皮清夜會西園良宴宛昨日馳暉凋壯顏涉江枉相存羣彥何翩翩尊酒
歡未畢良時苦不閒聊和絃歌曲結臆不能宣子為潛波鱗我作衝飈翰勗哉璫
璣美揚芬垂簡編

荅虞景明

嘉會城西隅皎皎陽春日手持郢人唱膠結意難畢宛轉含悲辛清響逾琴瑟申
章復永嘆知音慕儔匹豈無桃李華眷此蘭蕙質奮志揚芬芳結佩采秋實誰言
傾城姿終老在蓬室

上天竺雙檜峰

昔聞九里松夾路響清瀨今尋雙檜峰壁立衆山外危磴壘丹梯陰霞成紫蓋平臨江海寬俯看丘壑碎人生若飛籜倏與流飈會濡首塵埃間寧識滄洲大乘風叩闥闔浮雲接衣帶

答魏山人

養疴倦辭賦倚醉耽孤眠悠然遠山雲墮我北窗前攬之不可得滿屋生蒼烟知子薄雕蟲清嘯懷列仙時傾若下酒不問東臯田誰當理輕策相從巖壑間

暮投六一泉寺

石泉近湖曲皚皚自清冷照見古人心高風邁箕穎振策陟山椒朱霞散西嶺日暮烟乍生鳥歸林逾靜逍遙憩石梁杳冥動漁艇夜久衆星光猶明數峰影

答瞻伯

芙蓉生綠波乃臨大道側芳華雖憔悴濯濯好顏色夙昔贈我言綢繆在京國荏苒逾六春流光一太息新聲日以張正聲日以熄所愁郢客吟時俗罕相識

贈陳天祓

陳子瑚璉器珍重薦清廟官曹開素襟澹蕩有同調比舍易為歡時看一尊笑未

擬獻承明抗言思海嶠出守豈蹉跎掉頭乃長嘯草閣傍湖山清光相照耀猶懷
富春近儻就嚴陵釣

答史及超修撰

史乙未狀元乞歸終養又不食肉

白日出海門天宇何寥廓誰知應龍姿潛鱗戀丘壑射策敷天人著論攄蹇謬
天子推國士高坐石渠閣苦陳烏鳥情歸就萊衣樂肉食餘鼎俎餐霞止藜藿深
巷隔九達下帷耽寂寞坦履靜無營素衷欣有託感君枉贈篇德音非虛作

宋荔裳署齋留別

拳拳無中極中夜復淹留明燈移綺席卧我百尺樓念此吳會歡緬懷燕趙遊人
生逾四十飛光向西流十載一良會歲月忽欲道鷄鳴獨轉側起坐增離憂蟻穴
成江河寸壤累山丘志業貴早立升斗寧足謀明旦各分手策軌期千秋

從遊諸子追送至北闕

命楫日將夕言發一何難親交並集送臨歧猶未還行行越湖墅衆星聚以繁殷
勤二三子出餞此河干臨流啟高館四座聞秋蘭疲策昧饑渴對俎不能餐聊為
盡斗酒以解離別顏行矣各努力先民有遺言

雜言

好色衆所見自昔稱傾城蛾眉豈不姣見者不分明婕妤辭玉輦團扇還吞聲鑒貌良獨難誰能鑒精誠

二

愛馬能買骨萬馬樂為死獻玉不惜身大璞甘為毀知音既已稀寧作中林士哀絃發苦調沈憂不可弭

宴高子奮水部官亭

丹檻陵滄波飛梁互別浦詞人此高會詠言相勞苦華館生長風北山過疎雨萬頃碧荷花酒氣作香乳連床多賜書疊石成江嶼歡筵石城下別憶天津滸落日悵離顏秋色滿平楚

孤松篇贈杜于皇

孤松無沃壤托根生寒山介士無餘謀斂手拙朝餐前庭但種竹後園但種蘭饑來出奇語大笑開歡顏言當棄舊宅負耒林丘間沮溺非爾事抱書聊閉關

飲秦淮水樓

青溪陰垂柳夾岼浮朱樓延目睇鍾阜餘霞炯未收親交良會合置酒聊綢繆水
氣接靈飈夕爽成清秋王謝邈千載一逝不可求高言絲竹靜暮鳥何啾啾明旦
我當發道路良阻修誰令江漢廣浩然增離憂

湖西行

辛丑歲分守湖西壤瘠歲饑有司坐逋賦失職相望予奉檄按部督促是
時西南用兵不逾時符牒三四至吏民後期者法無赦於乎一官貶斥不
敢辭當柰民何有痛相告誡而已作湖西行

節使坐徵斂此事舊所無軍糈日夜急安敢久踟躕昨日令方下今日期已逾攬
轡馳四野蕭條少民居荆榛蔽窮巷原田一何蕪野老長跪言今年水旱俱破壁
復何有永訣惟妻孥歲荒復難鬻泣涕沾敝襦腸斷聽此語掩袂徒驚吁所慚務
敲扑以榮不肖軀國恩信寬厚前此已蠲逋士卒待晨炊孰能緩須臾行吟重鳴
咽淚盡空山隅

大阮歎

新淦縣東山有大阮其俗不急賦稅不用兵則吏廢法予檄招之幸有至

者庭諭以利害繼之流涕衆皆感泣於是陰捕其豪十餘人後至者蟻集
雖然比歲宿逋累鉅萬猝何能補故作詩憂之

叢山如劍戟灌木蔽欽岑其水獨南流溪谷皆阻深山民鳥獸居不馴匪自今追
呼敢逆命兵革踵相尋未能靜伏莽火烈悲焚林殺人稅無出遲回傷我心嗟嗟
亦赤子念爾為沾襟招手語父老鵠臬懷好音宿逋既累歲敲骨力難任民頑實
吏拙許身媿南金何時免素餐引疾投吾簪

竹源院

悲民難也地在新淦之東山其鄰曰大阮多盜兵至則走官檄竹源諸阮
義衆捕之而逸其豪已而盜殺竹源殆盡君子傷之

殺虎防啞人芟蔓莫留根留根終遺患傷心不可論竹源數百家今餘幾人存竹
外有源泉血流泉水渾羣盜故比鄰姻婭如弟兄反戈相啖食收骨無兒孫焚焚
數寡婦零落依空村凶年嗟半菽撮土招遊魂人亡畝稅在淚罷還聲吞

不寐

就寢已雞鳴昧旦復先覺荒城風雨急怒號如虎豹勞人一寸心萬事苦奔峭法

嚴吏牘多敢言吾職要習瘁不知疲未暇一長嘯徵求盡草木飛輓連海嶠湍水無靜鱗促絃無緩調力短達民艱空蒙肉食誚誰憐當塗人隱憂莫可告

集就亭

臨江官舍有高阜余就而亭之下
臨蕭江前對閣阜山名曰就亭

安拙成寡營賞心惟坐嘯結構期自然孤亭恣遊眺惠風始飏蕩旭日先照耀埤垵帶清源青冥開遠嶠野老或荷鋤舟人時鼓棹雖遠丘壑情即事見耕釣遐矚有餘懷臨觴難具道

自吉州之泰和道中

行潦猶在塗征車不遑息峽折忽泉聲徑轉復山色崎嶇巖壑間出沒何終極荒塗行旅稀虎跡交南北四顧多廢墟遺礎委荊棘回思未亂時山民亦繁殖

宿黃梔鋪

積雨暗千山陰雲催日暮哀此僕夫痛踟躕宿中路土室倚頽垣荒村存老嫗勅吏慎勿擾芻粟可自具吏言囊無薪乞糴亦無處時危供億艱含悽未忍怒盜賊兼虎狼空山懷百慮從騎夜擊柝宵分屢驚寤明旦風雨中鷄鳴驅馬去

寄李叔則秦中

舉世仍兵革章逢多老瘦烈士卷壯心悲歌倚巖岫瀉為江海流激與雷霆鬪未嘗
需苦吟何事費雕鏤信手作飛白騫騰軼篆籀棄官囊無錢詩草滿雙袖旅食家
廣陵文酒日輻輳贈答勤篇章洪鐘無虛扣一朝測禍亂早計決去就君自揚州西歸次年
揚遂驅車返函谷種菊開山園關河自茲隔道遠阻朋舊側聞太華奇思攬蓮峰
秀物役羈我身何時裹糧糗馳情望西笑離思纏宵晝

齒落

延歡苦不留憂老忽已至未知筋力衰齒牙先失墜木落春更生日落朝出地感
茲同逝川一往成捐棄妻子各驚吁為我色憔悴百族相啖食利齒反為累踈缺
亦何傷嘯歌猶稱意三復蒙莊言養生有餘媿

遣憂

岷山濫觴泉三江成電激岱宗膚寸雲九州霑雨澤丈夫志四海經營負長策胡
為甘獨飽拱手看饑溺四野多無田遺黎寄鋒鏑遠念平生親歲饑多感額節我
口腹餘分之以儋石少者寄升斗事微取當厄猶媿火燎原沾灑止涓滴自顧亦
何有薄祿存四壁

送表弟馬文虎

山中松與柏有時相抱生與子共本根能忘骨肉情中情苦難言一官憂患并常
恐素絲染抱疴思歸耕臨觴未及醉揮手送子行持此心耿耿歸照雙溪清去帆
忽緬邈流涕沾冠纓

買書

吏牘紛填委日與編簡踈黽勉耗薄祿時時搜舊書積笥不能貯列架盈坐隅妻
孥顧我笑餅粟罕留儲况君目已青殉此無乃愚卿言亦復佳性癖苦難祛卒業
誠未易泛覽資遊娛行當營草堂歸就雙溪居枕籍同寢處窮年長晏如

次龍頭山有懷胡悅之處士

劒水有遺民言在龍山岑維舟日已暝江亭生積陰夜久露微月參差見前林洞
門花塢暗曲磴茅堂深風波浩無極川路邈難尋勞生寡歡笑索居長悲吟佳人
阻咫尺孰與操素琴

洪川送王白虹

子來我方出踈我棲江干積旬始握手春花忽已闌長風蕩積水高樓生薄寒拳